

HEADLINES (EVENING)

- Khawvel pum huap ‘Kut Silfai Ni’ vawiin kha Mizoram District hrang hrangah hman a ni.
- Cooperation Minister Pi Vanlalawmpuii Chawngthu chuan Handloom leh handicraft chu eizawna a tling tih sawiin hmeichhiate pawhin chungkaw enkawl chungin an ti thei a ni, a ti.
- Himachal Pradesh Assembly inthlanpui neih dan tur vawiin khan puan a ni a, chuh tumte tana hming thelhuna hun hawn nghal a ni.
- United States-a California state-a ramkangah mi 40 an thi a, midang za tel chin hriat lohvin an la awm bawk.

<><><>

GLOBAL HANDWASHING DAY:

Khawvel pum huap ‘Kut Silfai Ni’ vawiin kha Mizoram District hrang hrangah hman a ni.

Aizawl-ah chuan Laipuitlang-a PHE Dept. hmunah District Swachh Bharat Mission (Gramin), PHE Dept. leh District Education Dept. buatsaih Global Handwashing Day hi Aizawl Bawrsap Dr. A. Muthamma hovin hman a ni a. Bawrsap chuan kut silfai hi natna hrik laka invenna pawimawh ber te zinga mi a ni a, mithiamte sawi dan chuan ei leh in tur siam dawn te, ei zawh te, inthiar zawh leh dam lo kut leh thil bawlhhlawh khawih zawh te hian kut chu Sahbawn nen ngei second 20 tal sil thin tur a ni a, tui thianghlim taka tleuh fai leh ziah thin tur a ni a, hei hian natna tam tak lakah mi a veng thei a ni, a ti.

He hunah hian PHED EE Pu Lalsanga’n kut sil dan tur entirin kal khawmten kut silfai ziah turin thu an tiam a, kut an silfai nghal bawk.

Lungleiah chuan SSA Mission, Lunglei bultumin Lunglei District huamchhunga school hrang hrangah “Our hand, Our future” tih thupui hmangin Global Handwashing Day 2017 chu Govt. Model Middle School (JNM)-ah hman a ni a, Lunglei CMO Dr VLMS Dawngliana’n a hmanpui.

Dr VLMS Dawngliana chuan hriselna tha nei tur chuan invawn thianghlim a tul a, fai taka kut sil hi ngaih pawimawh hmasak ber tur a ni a, kut silfai tawk loh avangin natna tam tak inkaichhawn thin a ni, a ti. Lungleia Global Handwashing Day hmannaah hian Govt. Model Middle School, Govt. Model Primary School Electric Veng zirlaite leh zirtirtute bakah sawrkar hnathawk leh thuthar thehdarhtute an tel a ni.

Champhai-ah chuan PHE Department leh Health & Family Welfare Department buatsaihin Govt. Primary School-II, tual zawlah hman a ni a, zirlai kalkhawmte chu Kut silfai dan zirtir an ni a. Dr Benjamin Lalruatdika, District Reproductive and Child Health Officer (DRCHO) in kut silfai pawimawhna leh tangkainate sawiin, Mizote chu kuta thil ei mai thin kan nih avangin thil ei dawn reng rengin fai taka sahbawn hmanga kut silfai ziah thin tur a ni a, hei hian kawthalo, khawsikpui leh Pneumonia lakah mi a veng thei a ni, a ti.

Lawngtlaiah pawh District SSA Mission buatsaihin khawvel pum huap kut sil fai ni hi Lawngtlai-III CYLA Hall-ah hman a ni a. DC Dr. Arun T.-in a hmanpui.

He hunah hian Lawngtlai District Hospital Medical Officer Dr. Zothanpari Chhakchhuak-in zirlai kal khawmte chu kut sil fai pawimawhna, a sil fai dan tur leh sil fai hun te a zirtir a. Kut sil fai chu naupang thihna tihhniamna kawng tha ber a nih thu te, sahbawn nen uluk takin second 30 chung kutphah, kut kar, kutchâng, kut tin, kutzungpui leh banrek te sil fai thin tur a nih thu leh sil zin luat a awm loh thu a sawi a ni.

Mamit-ah chuan zing karah GSA Playground-ah Global Handwashing Day hi hman a ni a. Addl. DC Pu H.Lianzela'n a hmanpui a. Kalkhawmte chu fai taka kut sil thin turin an intiam a, Dr. Nancy Lalnunmawii'n fai taka kut sil dan kalkhawmte a zirtirin kalkhawmte'n an kut an sil nghal a ni.

He hunah hian Mamit khawpui chhunga Department hrang hranga hotulute pawh an tel a, Mamit khawpui chhung School hrang hranga zirlai 565 leh zirtirtute kalkhawmin, school naupangte hi kut silna tur Sahbawn pek vek an ni.

(Corr/DIPR)

<><><>

LUNGLEI YMA RELIEF:

Kumin ruahsur nasa vanga Lunglei Dist chhunga chhiat tawk, nunna chan leh in leh lo chhia chhungkaw 170-te tan vawiin khan Sub. Hqrs YMA Lunglei office Conference Hall-ah tanpuina tangka fai Cheng Nuai 69 Sing 5 Sang 5 pek chhuah a ni.

Nunna chan mi 5-te chu Cheng Nuai 1 Sing 3 theuha ral an ni a; in chhe vek, a hmuna in sak lehna tlak lohte leh in sak leh theihna te chu an dinmun azirin tanpuina pawisa hi pek an ni. Tanpuina hi Town Branch-a mi 3 hnenah Cheng Nuai 1 leh Sang 5 pein, Buarpui Group-a chhungkaw 9 hnenah Cheng Nuai 7 Sing 3; Chawngte Group-ah chhungkaw 4 tan Cheng Nuai 2 Sing 1 Sang 5 & 900; Lungsen Group-a chhungkaw 100 tan Cheng Nuai 3 Sing 1 Sang 5; Sertlangpui Group-a chhungkaw 6 tan Cheng Nuai 2 Sing 5 Sang 5; Thorang Group-a chhungkaw 4 tan Cheng Nuai 2 Sing 6; Tuichawng Group-a chhungkaw 37 tan Cheng Nuai 17 Sing 9 Sang 5; Vanva Group-a chhungkaw 1 tan Cheng Sing 6 leh Zobawk Group-a chhungkaw 6 tan Cheng Nuai 4 leh Sing 2 sem chhuah a ni.

Sub. Hqrs YMA Lunglei President Pu R. Lalnunthara'n tanpuina sum hi Mizoram hmun hrang hranga YMA Branch-te'n vehbur khawna Central YMA-a an thawhkhawm a nih thu a sawi a, hetiang mi dang tanpui hi Mizo nun zemawi, tlawmngaihna atanga lo chhuak a ni, a ti.

Tanpuina dawngtu zingah hian Chakma eng emawzat an tel a. Sub.Hqrs YMA Secy. Pu K.Lalfakzuala chuan, tanpui ngai chu tu pawh ni se YMA chuan an rethei emaw an hausa emaw, chi leh hnam ang zawngin a thliar ngai lo tih sawiin, tanpui ngai tanpui kawngah ke a pen zel dawn, a ti a. Hetih rual hian hnam dangten YMA nihna hre Chiang lovin Social Media-ah te thu hriat nuam lo takin an bei thin a, hetiang thu hriat nuam lo hi tun hnuah chhehvela awm hnamdang te'n vawrh darh tawh lo se YMA chuan a duh a ni, a ti.

(Lunglei PTC)

<><><>

COOPERATION MINISTER:

Cooperation Minister Pi Vanlalawmpuii Chawngthu chuan Handloom leh handicraft chu eizawna a tling tiin hmeichhia te pawhin chhungkaw enkawl chungin an ti thei a ni, a ti.

He thu hi vawiina Samlukhai Community Hall-a sawrkar laipui Ministry of Textiles leh Mizoram Apex Handloom & Handicraft Cooperative Society (MAHCO) in an buatsaih Hastkala Sahyog Shivir (Handloom and Handicraft camp) hawn paha sawiin, Minister chuan Mizo thuam leh Mizo kutkawih ngaihhlut nachang kan hriat a pawimawh thu sawiin hnam ang pawha zahawmna a ni, a ti a. Khawvel changkang zelah handicrafts leh handloom te miin an hluta a man pawh a to chhoh zel avangin Mizorama mau tam tak awmte chu themthiam tan chuan eizawna tha tak a ni thei, a ti bawk.

Hastkala Sahyog Shivir (Handloom and Handicraft camp) hi sawrkar laipui Ministry of Textiles hmalakna in India ram pumah October ni 7, 2017 atanga October ni 17, 2017 chhungin khaw 200 chuangah neih a ni. Mizoramah chuan Samlukhai bakah Aibawk leh Hualngohmunah neih a ni.

(DIPR)

<><><>

CADC:

Larsap aiawha Chakma Autonomous District Council (CADC) sorkar enkawltu ni mek, Lawngtlai district Bawrhsap Dr Arun T. chuan fel fai zawka CADC-in hna a thawh theih na'n ruahmanna hrang hrang a siam.

Bawrhsap thu chhuak ang chuan, CADC hnuaiia zirtirtu atana lak, sikula zirtir hna thawk lova office hrang hranga officer, assistant, UDC, LDC, etc. anga chhawr an awma hriat a ni a. Hei hi 'Right to Education' dan kalh a nih avangin chutiang zirtirtute chu an thawhna department atangin sikul hrang hrangah October ni 15, 2017 hma-in an zawm vek tur a ni a. An thawhna department hotute pawhin a rang thei ang bera chhuahtir tur leh chuti ang zirtirtute chuan an hna zawm nghal thuai tura hriattir an ni. CADC Executive Secretary chu he thil hi lo bawhzui a, October ni 18 hma ngeia Caretaker /Lawngtlai Bawrhsap hnena hma lakna report theh lut tura tih a ni.

CADC hnuaiia sikul hrang hrang dinhmun en dika zir chiang turin member pathum – District Council PHE Asst Engineer, District Council Soil Conservation Officer leh District Council Sericulture Extension Officer te telna committee din a ni a. He committee hian CADC hnuaiia primary leh middle sikul hrang hrang building infrastructure te, zunram thiarna leh tui dinhmun te, zirtirtu leh thawktu dang dinhmun te, chawchhun sem dan te, RSBY leh programme dang dang kalpui dan leh sikul mamawh hrang hrang zir chiangin, kumin November ni 30 hma-in Caretaker hnenah report a theh lut leh dawn a ni.

CADC Caretaker chuan CADC hnuaiia hmasawna hna hrang hrangte mipuiin an hriat theih nan CADC website tihchantlunna tur thu chhuah a siam bawk a. CADC hnuaiia department hrang hrangte chuan thawktu awm dan leh an hlawh te, department hnuaiia scheme hrang hrang leh hna thawh mek chungchang – contractor, project cost, thawhna hmun, hmasawn dan leh hriattirna leh thu chhuah pawimawh zawng zawng chu website enkawltu CADC IPRO hnenah theh lutin, CADC website: www.cadc.gov.in-ah dah zel tawh tur a ni.

(DIPR)

<><><>

HIMACHAL ELECTIONEERING

Seat 68 awmna, Himachal Pradesh Assembly inthlanpui neih dan tur hriattirna chu vawiin khan Election Commission of India-in a tichhuak a, chuh tumte tana hming theh luh theih hun hawn nghal a ni.

Chuh tumte tan tun thla ni 23 thleng, hming thehluhna hun hawn a ni a, ni 24-ah hming thehluhte hi endik a ni ang. Ni 26 khi inhnudawh leh theihna ni hnukung ber a ni a, thla leh ni 9-ah vote thlak a ni ang.

Party hrang hrangte pawh inthlang tur hian ngawrh takin an inbuatsaih chho mek a, Cong leh BJP chuan an candidate turte an buaipui mek a, CPM chuan seat 30 an chuh tur thu sawiin an candidate tur hming 9 an puang tawh a ni. Hetih lai hian NGO pakhat, Umang Foundation chuan political party hrang hrangte chu an manifesto-ah Divyang-te harsatna chi hrang hrang chinfelna tur telh turin an ngen a ni.

(Newsonair)

<><><>

CALIFORNIA WILDFIRES

United States-a California state-a ni 6 kalta atanga ramkangah mi 40 an thi a, mi za engemawzat chin hriat lohvin an la awm bawk. Kangmei hi hmun hrang hrangah chhuakin engemawzat chu thelh mih ni tawh mahse la thelh mih theih lohna hmun 16 a la awm a, thli na tak a tleh reng bawk si avangin kang thelh hna thawktuten harsatna an tawh phah a ni.

Tun tuma kangmei chhuak hi an state-a chhiatna a thlen nasat ber tum a ni tih California governor-in a sawi a, chenna in sang tel a kangchhe tawh a ni. Santa Rosa khawpuia wine sawr leh siamna hmunpui, Sonoma bial chu chhiatna tuar nasa ber pawl niin mi nuai 1 chuang, chenna nei lovin an awm mek a, in ding zawng zawng kan ral fai vekna vengte pawh a awm a ni.

(Newsonair)

<><><>

RIJIJU ON ARUNACHAL INDIGENOUS PEOPLE

Union Minister of State for Home Affairs, Kiren Rijiju-a'n Arunachal Pradesh leilung fa dik takte chu humhim zel an nih tur thu sawiin Chakma leh Hajong refugee-te avangin an dinhmun a danglam phah lovang, a ti.

Vawiina All Arunachal Pradesh Students Union golden jubilee lawmna a hmanpuinaah he thu hi sawiin Pu Rijiju-a chuan Supreme Court thuchhuak avanga harsatna chingfel tur hian state sorkar leh All Arunachal Pradesh Students Union-te bakah pawl hrang hrangte chu thawkho turin a ngen a ni.

Arunachal Pradesh-a Chakma leh Hajong raltlante hi Supreme Court chuan khua leh tui nihna pe turin kum 2015 khan sorkar laipui a lo hriattir tawh a, heng Chakma leh Hajong-te hi kum 50 vel kaltaa East Pakistan atanga rawn raltlan an ni a, tunah hian mi nuai 1 thelh an tling tawh a ni.

(Newsonair)

<><><>